

20 Bi Gvaqlaeng Ma Ranzmbanj

20 年后回家乡

贵港市覃塘区蒙公乡高占小学五(1)班 李慧



Gou lizhai ranzmbanj, youq gizwnq gunghcoz gaenq miz 20 bi lo. Baezneix gou miz gihvei ma daengz ranzmbanj biek bae haujlai nanz haenx.

Ci youq gwnz lohhung gvangq-langh vaiqvattat hai bae. Ma daengz bakmbanj ranzmbanj, gou hai conghe-cueng aenci, va gyaundeis song mbiengj loh buet coh baihlaeng, rumz ci daeuj heiqla homfwdfwd. Gofaex hungsang ndwn youq song henz loh, lumj baux bing youq bakmbanj hensouj ranzmbanj nei. Gou dingz ci roengzdaeu, daj ndaw ci okdaeu,

yiengq baihnaj byaij bae. Funghgingj gyaundeis yienh youq baihnaj gou.

Gaxgonq ndaw mbanj gij ranz vaihvad, seizneix dwg baenz doengh baenz doengh laeuz sang daengjsoengz hwnjdaeu; gaxgonq lohnamm mboep-doed mbouj bingz, seizneix gaenq bienqbaenz diuz loh suiwnz youh seuq youh bingz youh gvangq-langh……

Gou swnh loh byaij bae, gwnz dah diuz giuzfaex mbouj raen lo, seizneix gaenq bienqbaenz diuz giuzgungjrin ndeu. Raemxdah lij dwg yienghhaenx sawndikndik, raemxdah lae bae gaenjlulu, yinxhwnj gou dauqngex hwnj seiz iq. Seizhaenx gou ceiq gyaenz caeuq gyoengq doengzdoih bae ndaw dah gaeb duzbya, duzgunq caeuq duzbaeu. Gyoengqdou mbouj

dwg gaeb daeuj gwn, couhdwg gaeb daeuj cuengq youq ndaw bingzbohli ciengx. Diuz raemxdah neix fueng-bienh gyoengq vunzmbanj saeg buhvaq, vunz mbanj youq henz dah itmienh saeg buhvaq, itmienh miz gangj miz riu, angq raixcaix. Ndw dah duzbit daj henz ndang gyoengqde youz gvaq cungj mbouj lau saek di. Ha! Caen lumj fuk dozveh gyaundeis ndeu ha!

Gou cingq maez youq ndaw seiq doenghbaez, sawqmwh dingqny sing haemq: “Siujvei, siujvei!” Gou nyex gyaeuq gvaqdaeu baez yawj. O, yienzlaiz dwg boh’au. Gou raemxda nyoenx okdaeu, gikdoengh cam: “Boh’au, mbanj raeuz bienq ndaej yienghneix gyaundeis, gou gig doek-saet, siengj mbouj daengz ha!” Boh-

au itmienh byaij itmienh naeuz: “Neix cungj dwg dangj lingjdauj caeuq gvansim, gaijgwz gaihfang hawj gyoengqraez bienq fouq!”

Song baux dou byaij haeuj mbanj bae, boh’au itmienh byaij itmienh lwnh gou nyi: “Neix dwg ranz Luz, neix dwg ranz Lij……” Gyoengqdou byaij daengz doengh laeuz daengjsoh sang-ngau ndeu seiz, boh’au dingz roengz-daeuj lo, de naeuz: “Daengz ranz lo.” Aenlaeuz youh sang youh gyaundeis. Boh’au daiq gou haeuj ndaw ranz bae seiz, cij yawjraen gyoengq beixnuengx naengh youq ndaw ding. Gyoengqde yawjraen gou ma daengz ranz, cungj ndwn hwnjdaeu angqcoux gou. Gou caeuq gyoengq beixnuengx miz gangj miz riu, ndawsim gou raeujrubub.

Ha! Ranzmbanj bienqvaq daiq lai lo! Danghnaeuz gou mbouj caen da raen, gou siengj hix siengj mbouj daengz bienq ndaej yienghneix gyaundeis ha.

(指导老师:覃红梅)

Gojgaeq Gou Caeuq Saw

我和书的故事

贵港市覃塘区蒙公乡高占小学五(1)班 林诗雅

“Ngoenz ndeu mbouj miz saw, bak saeh mbwqmbwtmbwt.” Gawq vah neix gangj ndaej deng ha! Ndw saedceij raeuz liz mbouj hai saw, gou couhdwg youq ndaw doegsaw majhung. Gou caeuq saw miz haujlai gojgaeq mizyinx, lajneix gou caeuq daihgya gangjgangj gienh saeh gou caeuq saw he!

Geiq ndaej ngoenz haenx, gou youq ndaw gunghyenz youz, sawqmwh, gyaq danci ndeu gig vaiq daj henz ndang gou bongh gvaqbae, “bung” sing ndeu, miz geij bonj saw daj gwnz ci doek roengzdaeu, baux caij ci cungj mbouj rox saek di. Gou byaij gyawj baez yawj, va! Yienzlaiz dwg geij bonj saw gou loq cungj siengj ndaej daengz haenx——《Gwzlinz Dungzva》! Lij dwg baenzdauq ne! Gou ngamq siengj heuh bauxcawj de, hoeng, bauxcawj de gaenq mbouj raen

ngaenz lo. Mbouj guenj baenz lai, gou sien dawz daeuj yawj gonq.

Gou ra giz dieg cingx ndeu naengh roengzdaeu, gaenjlulu dwk fan hai saw, lumj duz nyaenma dungxiek gwnguk nei yawj hwnj-daeuj. Seizgan mbouj rox mbouj nyinh gvaqbae lo. Sawqmwh, gou yawjraen miz baux bohlungz ndeu daj baihsuix byaij gvaqdaeu. Cij raen de ngaem gyaeuq lumj ra gijmaz ityiengh. Gou byaij bae coh de, cam naeuz: “Bohlungz, mwngz ra gijmaz?” De naeuz: “Gou daeuj ra saw, gou miz geij bonj saw doek lo.” Gou youh cam naeuz: “Dwg gijmaz saw?” De naeuz: “Dwg 《Gwzlinz Dungzva》.” Dingq de yienghneix gangj, gou couh dawz geij bonj saw haenx okdaeu, cam de naeuz: “Dwg mbouj dwg geij bonj saw neix?” De baez yawj, angq dwk naeuz: “Dwg, dwg, dwg, couhdwg geij bonj

saw neix.” Dingq baux bohlungz neix yienghneix gangj, gou gig mbouj nyienh dwk dawz saw hawj de. Bohlungz lumj yawj ndaej ok simsaeh gou nei, couh dawz gij saw neix soengq hawj gou, lij haenx gou dwg baux lwngyez gyaenz doegsaw. Gou angq raixcaix, lienziengz docih de. Ma daengz ranz, gou ganjip dawz geij bonj saw neix okdaeu yawj.

Neix couhdwg gojgaeq gou caeuq saw, saw daiq hawj gou haujlai yinxdaeu, gou gyaenz doegsaw.

(指导老师:覃红梅)



Vagut

菊花

贵港市覃塘区蒙公乡
高占小学 黄思娜

Vagut yiengh daegbied saek gyaundeis, mbouj lau fwnrumz, dwg Cungguek cib daih va mizmingz ndawde cungj ndeu.

Vagut gig ndei yawj, vunz lai gyaenz bae ngonzyawj. Saek vagut ciebfan ronghsien. Hoengz ndaej lumj feiz, henj ndaej lumj gim, hau ndaej lumj faiq……Haj nganz roek saek, gyaundeis raixcaix!

Vagut dwg yw gaij ndat gaij doeg, naengz dangj namhaenx, sup ndaw hoengheiq gij heiqdoeg doiq vunz miz haih haenx.

Vagut naih ndaej nit, naih ndaej rengx, ceiq gyaenz dieg sang、namh laeg、namh biz、namh mboeng、namh baiz raemx ndei haenx. Ganj caeuq mbaw vagut moix ngoenz youq banngoengz ndit dak supaeu yingzyangj majhung. Moix hwnz gyanghaemh mbwnlaep caeuq gyanghaemh 10 doh vwnh-du hab va nyod maj.

Vagut dingj ndaej nit youh naih rengx, gou gyaenz vagut gienggiengz mbouj fug、baenzbaenz cungj mbouj lau haenx.

(指导老师:覃红梅)

Daxmeh Gou

我的妈妈

贵港市覃塘区蒙公乡
高占小学二(1)班 韦墨



Daxmeh gou dwg baux nungz-giswh ndeu, bineix 38 bi, ndang reuxred, byoemgyaeuj ndaemndet raezrang, de baez riu hwnjdaeu, gyaundeis raixcaix.

Daxmeh ciengzseiz son gou aeu gyaenz doegsaw, cijaeu gou siengj cawx gij saw gou gyaenz haenx, daxmeh cungj cawx hawj gou.

Miz baez ndeu, gou caeuq daxmeh bae haw guhcaemz, byaij gvaq aen ranzgaisaw seiz, daxmeh naeuz: “Raeuz haeujbae yawjyawj ba!” Dou byaij haeuj ranzgaisaw bae, va, ndaw ranz dauqcawq cungj baij miz saw, saw lwngyez ha, saw bauxlaux ha, gak cungj gak yiengh.

Gou caeuq daxmeh nyinhcaen yawj saw, doeklaeng gou genj geij bonj saw gou gyaenz haenx, gaem daengz baihnaj daxmeh, daxmeh lumh gyaeuq gou naeuz: “Siengj doegsaw couh cawx ba, bonjsaw ndaej hawj mwngz haujlai cihsiz, baema ndeindei doeg bw.” Gou umj geij bonj saw, angq-vauvau dwk itmienh ciengqgo itmienh naengh danci daxmeh dauqma lo.

Doeklaeng, daxmeh lij bang gou cawx ma haujlai saw. Gou siengj doiq daxmeh gangj: Daxmeh, docih mwngz, gou itdingh ndeindei doegsaw, mbouj hawj mwngz caeuq daxboh saet-muengh.

(指导老师:覃珍团)